




REPUBLIKA E SHQIPËRIE
MINISTRIA PËR EVROPËN
DHE PUNËT E JASHTME

Ministria për Evropën dhe Punët e Jashtme informon qytetarët mbi masat që duhen marrë pas publikimit të shifrave nga MPJ kineze

2020-01-29 16:51:00



Nisur nga situata epidemike e coronavirusit nCOV në Provincën e Hubeit me kryeqytet Wuhan, autoritetet kineze kanë informuar mbi numrin e të infektuarve, masat e emergjencës dhe rregullat e forta administrativo-shëndetësore që duhet të ndiqen pas kësaj situatë nga të gjithë shtetasit e huaj që jetojnë në Kinë.

Zyrtarët kinezë bënë me dije se, disa vende kanë kërkuar evakuimin e shtetasve të tyre përmes avionëve "charter", por, sipas tyre, në këtë situatë, ky hap nuk është i nevojshëm dhe nuk rekomandohet nga pala kineze. Në raste të tilla duhet të ndiqen të gjitha rregullat ndërkombëtare si dhe rregullat e masave parandaluese të vendosura nga autoritetet kineze, që, sipas tyre, po zbatojnë një sërë procedurash të komplikuar që nga lejet e fluturimeve, etj.

Sipas përfaqësuesve të MPJ kineze, çdo shtetas që del nga provinca Wuhan, duhet t'i nënshtrohet një karantine 14 ditore, para se të lëvizë lirshëm.

Nga statistikën e publikuar nga autoritetet kineze sa i takon situatës epidemike nCOV deri tani janë:

- 2,823 raste të konfirmuara
- 5,794 raste të dyshuara
- 58 të rikuperuar
- 81 vdekje

Pekini ka 72 raste të konfirmuara, 2 të rikuperuara dhe asnjë vdekje.

Provinca e Hubeit me kryeqytet Wuhan ka numrin më të lartë të rasteve me 1,423 të konfirmuara, 47 të rikuperuara dhe 76 vdekje.

Të gjitha provincat kanë raportuar raste dhe në shumicën prej tyre është shpallur gjendja e emergjencës së shkallës së parë, niveli më i lartë i emergjencës. Ndërkohë, përveç Kinës dhe vendeve fqinje, virusi tashmë ka kaluar edhe në kontinente të tjera, përfshirë edhe Evropën.

Nisur nga kjo situatë dhe nga fakti që një numër shqiptarësh studiojnë, punojnë dhe jetojnë atje, ambasada shqiptare në Pekin është duke ndjekur me vëmendjen maksimale situatën dhe është në kontakt të vazhduar me ta. Ministria për Evropën dhe Punët e Jashtme do të vijojë të mbajë të informuar qytetarët për zhvillimet e situatës.